

續修雲林寺志

續修雲林寺誌卷三

檀越

錢塘趙夢祥捨田碑記曰

予茲年六十有五矣憶自幼就傅讀書稟資椎魯比
長習舉業弱冠後始博一衿斯時父母俱存予切思
稍得寸進榮我父母庶不負生育教養之恩無如困
蹟場屋偃蹇半生俯仰之餘愧怍良不淺也父卓齋
府君於乾隆乙卯歲四月見背予仍偷生人世日惟
以不得顯揚府君爲已恨嘉慶丙辰春予卽敬謹擇
地歲之十二月卜葬於留下大嶺金鐘山之麓母黃

太孺人歲在甲子時年七十有七予常瞻依色笑竊見其精神康健飲食如常因欣然援例太學思就北試不期事未果而母病且失明遂至抑鬱成疾壽終於丁卯三月噫予之隱痛無窮期也戊辰冬卽合葬於先考之墓由是功名之心淡然矣予娶婦章氏身多疾病生一女後遂無所出父母在日屢迫予置妾以爲後嗣計予私自嘆曰我不能顯親揚名已爲不肖予卽有後亦安望其賢且能也是以惟唯唯應命而終不果從歲癸酉十月予婦亦歿予亦急爲之葬焉至此而予息之心更淡然矣旣而思之無名不

彰無後不孝罪重孽深將何以追因思予自兼經營
數十載稍有積蓄予婦歿時將所有已貲集胞姪十
餘人一一酌量分與無忘一本餘則留置田畝以奉
祭祀惟是置田一事非誠實精明者未敢輕託是以
曠延時日今春三月有同里徐公宗魯於公誠天何
公聖懷皆先考莫逆交不期而遇談心永日見予鬱
鬱而問焉予卽剖其心腹之事而告以故遂卽長跼
請託此三人本樂成人善而又憫予志之肫誠皆慨
然諾何幸默叨庇佑不一月竟得紹興府蕭邑二十
都白露塘邱家橋同在制字號內民田三十五坵計

田九十二畝三分零大毫急來告慰予欣然拜謝曰
予之素願遂矣微三君子之力亦安能玉成其事耶
惟念向日所留存者因他用而不能滿數予乃傾其
所有以付齊田價當卽過戶完糧投納契稅共計制
錢肆千捌百千文竊思田畝得之固難守之更難是
以立願將此田永遠捐於西湖雲林禪寺常住際此
年豐歲稔每年得收縣市斗晚稻租米壹百零壹石
伍斗柒升以供大眾一粥之助伏冀方丈屆予考妣
及予婦生歿忌日不忘超薦無負予志聊以報生育
教養之恩於萬一云爾嘉慶己卯四月八日夢祥記

禪祖

在瞻元禪師蘇州震澤縣人氏自幼喜聞母氏口誦
佛號至七八歲時亦能侍誦真宿具善根人所不
及年十歲自願出家於龐山妙智寺依西嵐老宿
爲師嗣受具于雲林巨濤老人并傳心印千七百
則公案一一深究于乾隆十八年繼主法席七載
蒙

高宗純皇帝幸寺

賜紫衣一襲及香金等師兼善吟咏詩稿語錄若干卷
皆未付梓世壽詳於塔銘塔建北高峰麓名曰耐

亭塔所同門弟宜信爲之銘

禹傳源禪師海甯州人氏出家于本州崇教寺幼而
穎悟究習儒業博通釋典年甫弱冠蔬食布衣誓
爲佛子父母許之後捨俗出家卽持戒律從巨老
人咨受禪理於乾隆二十四年主持方丈二載退
居靜室有年終日禪課之餘吟哦爲樂事嗣法者
十餘人所著諸稿弟子俱欲付梓師怏怏然曰昔
初祖東來不立文字我等如許饒舌恐爲後人覆
醬瓿耳遂不果其事乾隆某年秋忽示徒曰我所
願歸安養耳飲食頓減至旬餘書偈畢彈指而逝

印圓泉禪師湖州府烏程縣沈氏子出家於雲林祇園房年滿二十受具後心專戒律日益精究惟蒲團竹椅作爲消磨歲月工夫巨祖延爲首領乾隆二十五年推舉直指堂頭四載退居本房壽得古稀結跏而逝

玉山琳禪師蘇州府吳江縣人氏出家于全福寺受法于巨祖凡寺中首領一一網維機鋒迅利得巨祖奧旨可稱入室弟子乾隆二十八年春雲林虛席蒙浙江撫憲熊公并文武各憲闔郡紳縉洎兩序大眾公舉主席據室云者是我乃祖乃父拈烏

豆子換人眼目憑他道德力挽頽綱重光祖道之所情知今日迴避不及又被業風吹轉露頭露面承伊嫡派兒孫不敢改腔換調若是依樣胡盧一向目視雲霄從不辜負自己拈拄杖喝一喝云試看拔劔攪龍門下座三十年閏二月十二日蒙

高宗臨幸寺中迎

鑒并

賜物件時奉各憲兼任法喜寺師以事繁辭院閉關習靜三間茅屋七破蒲團於三十七年夏法兄淡山和尚告退院事兩序大眾復請主持茲寺三載嗣

法徒十有餘人著有玉山語錄行世壽得花甲餘
塔建本山

淡山岳禪師南京江甯府上元縣人氏出家于萬壽
寺工詩書參訪名山至雲林適巨祖上堂垂釣師
禮畢遂問鷺峰既能飛來因何終日不動答云等
個人來進云何時飛去答云大事未明又進云初
祖一葦航來不立語言文字今日和尚有何法說
答云提起提起放下放下遂禮謝云天人一切皆
歡喜晝夜六時恆吉祥卽侍巨祖爲記室數載得
盧行者春米工夫巨祖授衣鉢眞傳爲三峰五代

孫也篤意釋典暇攻儒術於乾隆三十五年住持
方丈三載一日索筆書云生也空來死也空不知
南北又西東泉臺不論貧與富只問陽間六字功
擲筆而逝

燦光照禪師湖州府人氏出家于仁和縣滿月菴少
游京師乾隆五年蒙

高宗開建

皇壇授戒師遂圓具也嗣後出都至雲林巨祖授職多
年凡詩書佛事皆出師手卽爲囑咐乾隆三十九
年主席方丈至四十七年重修大殿而辭院事嗣

法徒三十餘人未祝髮徒皈依雲集後得無疾而終

顯微慧禪師嘉興府石門縣董氏子出家于杭州府仁和縣下水陸寺依徹源老和尚脫俗受大戒於雲林燦祖於禪教二宗參訪殆徧遂得燦祖之衣鉢職任班首乾隆四十七年主持方丈至五十一年退院本寺靜養有年無疾示偈曰兩拳打破塵埃撥一杖曾挑芒履歸結跏而逝

大千禪師諱重照號竹堂海昌許氏子也披薙於永福寺乾隆丙午主講雲林得法于澹山岳禪師庚

戊年恭逢

高宗純皇帝八旬壽誕奉撫憲奏明進

京祝

壽敬禮無量壽佛懺

欽賜藏香福字黃緞等物辛亥孟夏退居滴翠軒圓寂
於嘉慶十二年六月十九日酉時距生於乾隆甲
子年十二月二十五日午時壽六十有四

振修瑞禪師海甯州人氏出家于蕭山縣關帝廟得
在祖心印於乾隆五十六年主席方丈至五十八
年退院辭眾念佛而化

元瑞密禪師嘉興府秀水縣人氏出家于眞如寺記
茆王祖自幼一日數行穎慧過人本分以外兼工
書畫乾隆五十八年兩序大眾恭請主席兩載凡
筆墨不輟爲人作世故罕見壽得七十有三嘉慶
六年秋偶得微疾月餘具浴更衣書偈曰父母未
生以前不知何形何迹父母旣生以後今日臨命
呼吸任他黃金尊貴總不如南無阿彌陀佛書畢
趺坐而逝

德恆恩禪師嘉興府石門縣蔣氏子兒時聰慧異常
稍長父母願捨出家于杭州仁和縣仙靈寺依師

肄業常於經櫬句中淡領妙旨年壯至雲林受具
足戒留常住授頭首之職暇惟靜坐觀心故凡所
作絕無輕忽因嗣印祖之法于乾隆六十年憑眾
推出爲法王座主在位未及一載因其專任治生
故多勞悴遽忽示疾沐浴更衣索筆書偈曰一三
五七九生死如翻手去來無所從蝦跳不出斗書
罷擲筆而逝

志安秀禪師浙江湖州府歸安縣人氏出家于本縣
正福寺依師卽現僧相年二十餘來雲林受戒發
明毘尼大義自甘苦志不忍踰矩留於常住執事

多年無犯得禹傳老人導其入室親爲印證于嘉
慶元年主持方丈三載嗣退養於千佛閣師深心
渾厚本分之外不加毫末老回正福寺遂終於二
十二年壽年五十有九嗣法眾門人迎龕歸雲林
塔建北高峰麓

道隆覺禪師嘉興府桐鄉縣王氏子從幼出家杭州
錢塘縣雲林寺祇園房依師習禪歲壯在本寺圓
具因人才出衆心志不凡遂得禹祖付受心印於
乾隆五十年適上天竺法喜寺虛席蒙各憲黜
此任至嘉慶三年兼攝雲林方丈至四年示疾年

壽六十有四

心安中禪師浙江湖郡烏程縣翔翔村王氏季子生於乾隆九年九月十六日子時甫生三歲時喜跏坐合掌有韜光位三師過其門見而異之謂其父曰此子大似佛門種子他日定爲梵天之精進幢也父曰稍長當捨出俗至年八歲果來從位三師出家至十八歲除染依師講習有年僅明心地俄承外護崇奉重新韜光寺貌尋受戒于報恩寺弼山和尚歸受雲林顯微老人之法至嘉慶四年四月眾推主席茲寺方丈後仍退居韜光於十一年

正月二十一日沐浴更衣命門人輩焚香點燭跏
坐合掌念佛至戌時奄忽而逝世壽六十三歲僧
臘五十六歲龕葬於龍門山

德山如禪師湖鄆歸安李氏子出家於邑中寶靈寺
依性榮老宿薰染後住雲林參顯微慧禪師有年
遂嗣授記別於嘉慶四年夏蒙大中丞王公舉主
茲寺方丈輪奐重新禪門振作後退居本寺至道
光元年十二月十六日偶染微疾旬餘起作偈云
六十六年飄蕩前後中間一樣若道今歸何處迥
盤緣牆而上擲筆而逝嗣法者十有餘人塔建於

龍門山麓

性宏口禪師心在和尙法嗣嘉慶十年主持方丈半載餘

淨一禪禪師浙江嚴州府桐廬縣人氏出家于環翠菴受囑大千照老人于嘉慶十年主持方丈三載退養於觀音殿示疾于二十二年

若水來禪師江南徽州府歙縣劉氏子壯年厭棄塵俗願入空門來依雲林元瑞密老人薙染卽於本寺具戒自肯深研律中義味故每誦戒不輟而兼潛心宗教卽承密老人之咐囑于嘉慶十二年大

眾請接雲林方丈之位初則堅辭三請而後勉然從之無何嫌住持事繁心向外應恐失內照之功十四年卽退而養靜於慧日塔院晝夜精修淡得念佛三昧嗣因身力漸衰自知幻軀將應脫落遽于道光元年辭世壽六十有六召門弟子遺囑後事羣弟子問曰師今棄此何歸答曰無明暗處聲絕而逝

品蓮月禪師號藕船江南揚州府江都縣徐氏子一十八歲出家年滿二十來雲林求戒戒相旣圓堅持無犯窮研教典竟入悟門其所工蘭竹淡得所

南翁之旨時與筆墨交者惟揚州八桂之一吳貫
之名唯者是也師兼精琴理其所作詩詠書法別
有逸趣依志安秀老人而獲證也於嘉慶十四年
眾舉主持方丈於十六年退養于千佛閣禁足禮
華嚴經禪課之餘惟翰墨鼓琴爲樂耳且得禪理
功深心多解脫故所有詩句語錄均不收集瀟灑
一生臨終談笑而逝壽年六十有六

惠周慈禪師浙江嘉興府石門縣王氏子出家于本
縣羔羊寺東房依師修學尋至雲林受具足戒卽
任寺職苦志清心煉磨有日徹悟無生之座也師

條陳得緒導眾有方其風範之規真堪紹隆三寶
旋即退居於十八年惟日以禮誦亦解吟咏時能
覓句自遣于道光五年示疾召門弟子曰吾欲化
去爾曹切勿悲傷口音纔絕撼之不動而已逝矣
壽六十六歲

朗緣和尚諱律果德恩老人法嗣於嘉慶十八年住
持方丈三載現住法喜寺方丈十餘載

定蓮凝禪師浙江杭州府餘杭縣嚴氏子自幼出家
于本府錢塘縣集福菴依師講修懺法而兼及經
教年餘三十來雲林授三壇大戒遂留職事一心

勤慎絕無掛誤餘閒神留宗教一日靜坐忽嗅檀香恍然而悟曰者個元在這裏得法於惺一初老人於嘉慶二十年紳耆泊兩序延請而登茲寺方丈位也于二十一年登座說法辭眾化去壽五十有六

研菴和尚詳後

德慧明禪師江南常州府宜興縣劉氏子幼喜清淨二十二歲父母雙亡捨俗出家於本府荆溪縣六峰菴親師五載稍會禪理具戒于鎮江府丹徒縣金山江天寺歸卽辭師來雲林挂搭遂授職多年

嗣承大千老人之法參叩絲密頓明心地旋陞座
于嘉慶二十一年間蒙撫憲楊公命任住方丈僅
於本年冬身亦無病將知涅槃召眾示偈曰唯此
一事實心達難着跡餘二則非眞塵空無分別壽
年六十有六

聖川清禪師浙江嘉興府桐鄉縣沈氏子幼依本省
杭州府錢塘縣昭慶寺經房性謙師出家既壯詣
雲林學律忽悟三千威儀八萬細行均從律起上
來諸大祖師無不以此精進而得成道者自此醉
心律部雖力殫神疲不改初志俄因若水泉老人

知是法門龍象授與衣鉢于嘉慶二十一年大殿
被災後方丈虛席迨於二十二年春蒙各憲之命
而任方丈之職自此日夜周章計建大殿卽行疏
叩十方于二十三年冬蒙

內庭

恩賜帑銀壹萬兩

欽命重建又感趙祖越顯捨齋田九十餘畝其志固在
復興身任過勞日漸減膳誰知大願難酬竟於二
十五年冬病人膏肓而召大眾說偈辭世曰者個
原無名相能爲法王大將而南觀北工夫此日始

知方向說畢右脇而逝

心在口禪師印圓老人法嗣於乾隆五十一年住法喜寺方丈五載

心一口禪師大千老人法嗣於嘉慶四年住法喜寺方丈四載

友三戒禪師顯微老人法嗣於嘉慶七年住法喜寺方丈十一載

竺軒安禪師道隆老人法嗣住安隱寺方丈數載

寶林鑑禪師浙江嘉興府人氏幼通儒釋之典壯則負笈來雲林具戒依玉山老人座下扣決心要而

得通明一切遂承嗣也餘閒工寫梅蘭親受一泉
老人指示而得畫名後於乾隆五十五年出世主
持勝果寺方丈至嘉慶十年退院壽七十歲將衣
鉢付與品高

品高峰禪師兼命繼主其席師俗杭州陳氏子承師
之學亦善畫梅故得師資道合真所謂明月梅花
師若弟子也於嘉慶二十五年退院卽於道光元
年患疾不起服藥罔效而終世壽五十七歲

道先悟森禪師松江府華亭縣陳氏子性多靜默雅
喜坐禪師與懷清老人參論個事頗爲稱理遂受

記荊也旋將遠近同志知是禪門飽學內外首領
無不紀綱辭懷老人參訪名山十有餘年嘉慶二
十年間復來雲林延爲首座之職凡冗中佛事皆
師秉拂也師靜養於普賢閣除佛事以外終日杜
門不出著有詩稿語錄若干卷忽于道光九年九
月四日索筆書偈曰這一隊無用漢子在人間六
十六年將千七百陳爛葛藤覆去翻來言三語四
咄今朝撒手歸西去兩袖清風明月回寂然而逝
師法嗣見初號懶堂精篆刻晶玉陳粵生司馬甚
契之

體純大師諱潔號粹自江南吳江縣柳氏子自幼出家於雲林妙應閣依昇達象禪師脫白後隨師主席京都方丈日結詩社與名士大夫往還唱和至道光初年南還養靜本房凡故舊出京過訪辭不納惟鎮浙將軍薩宥阿常許過從而請決禪要也然師與小顛學誠相埒顛師詩酒生涯著名寰宇師則性心無礙枯寂空山世誰知之哉于六年夏減膳旬餘遂作偈曰卅年功德兩茫然想被前程業識牽今川金剛王寶劍一揮斬絕死生緣生來死去總分明老病猶能自遣情忽地一聲參已透

便應一一了無生一點向人瞞不得石龜脫殼事
何如可堪常日光中樂定裏身心了幻虛萬事雲
烟榮曜眼百年榮辱不關心平居自信塵緣淨久
約慈航直到今靈明湛寂家中寶罔象撈空海底
針紙上任君拈頌得圓機逗徹意何深松檠驚風
鳴萬壑梅梢得月影逾幽綠心若不離綠影何啻
虛空釘鐵頭偈畢泊然而逝年六十有六

古塔

巨壽果禪師

塔在寺中慧月院

在瞻元禪師

塔在天聖院東側耐亨塔



禹傳源禪師

塔在青龍山麓聯輝塔

印圓泉禪師

塔在龍門山

玉山琳禪師

塔在青龍山麓聯輝塔

淡山昂禪師

塔在青龍山麓聯輝塔

燦光照禪師

塔在青龍山麓聯輝塔

顯微慧禪師

塔在龍門山

大千照禪師

塔在龍門山

振修瑞禪師

塔在青龍山麓

元瑞密禪師

塔在方丈後山

德恆恩禪師

塔在龍門山

志安秀禪師

塔在龍門山

道隆覺禪師

塔在龍門山

心安中禪師

塔在龍門山

德山如禪師

塔在龍門山

性宏潤禪師

塔在龍門山

靜一禪禪師

塔在青龍山麓

若水來禪師

塔在青龍山麓

品蓮月禪師

塔在龍門山

惠周慈禪師

定蓮凝禪師

德慧明禪師

塔在青龍山麓

聖川清禪師

塔在青龍山麓

有三戒禪師

塔在龍門山

惺一口禪師

塔在龍門山

○燦光照○顯微慧

○心安中

○德山如

○見能謙

○有三戒

○寶林鑑○品高峰

○玉山琳

○元瑞密

○若水來

○聖川清

○在瞻元○振修瑞

○惠周慈

三垂德

三垂重

三垂律

三垂儀

巨濟果

○印圓泉○德恆恩○朗緣果

心在口——性宏潤

淡山吳大千照

廣浩海
惺一禪
淨一禪
德慧明
新明誠

新明誠

定進凝

禹傳源

志安秀

品蓮月

道隆覺

山軒安

世系圖

釋達受 六舟

三峰支派爲漢月藏禪師由江蘇之虞山三峰至雲林自立之門戶也故曰三峰家自藏祖以下法派孫膺兩志已載各有失收因世遠年湮無從細詢備載今從巨濤和上之下始分爲六支定例充此任者由六支議舉六人拈闕以定甲乙輪流繼主是席此世系圖凡直綫下者俱是六支正宗綫之偏傍下者或分出別院者主席或寺所屬院者主席以及將來俟闕者此三等皆書小字別之凡同儀字輩填就知者錄入餘俟再補

住持年分

巨濤

雍正十年接乾隆三年復任十八年退

在瞻

乾隆十八年接二十四年退

禹傳

二十四年接三十五年退

印回

三十五年接三十八年退

玉山

三十八年接三十五年退三十七年復接三十

淡山

三十五年接三十七年退

聚光

三十九年接四十七年退

顯微

四十七年接五十七年退

大千

五十七年接五十六年退

振修 五十六年接五十八年退

元瑞 五十八年接六十年退

德恆 六十年接本年退

志安 嘉慶元年接三年退

道隆 乾隆五十五年接法喜寺方丈嘉慶三年退本

心安 四年接本年退

德三 四年接九年退

性宏 九年接十年退

靜一 丁年接十二年退

若如 十二年接十四年退

品蓮

十四年接十六年退

惠周

十六年接十八年退

剛緣

十八年接二十年退

定蓮

二十年接二十一年退

見能

二十一年接二十二年退二十五年復接

德慧

二十二年接本年退

聖川

二十二年接二十五年退

素風

二十五年接本年退

以上諸方丈接退年分保查萬年簿并碑記以此
爲准也

雲林寺續誌卷三終

續修雲林寺誌卷四

語錄

五代清聳禪師法語

杭州靈隱清聳禪師參法眼眼指兩請師曰滴滴落在上座眼裏師初不喻日後因閱華嚴感悟承眼印可上堂曰十方諸佛常在汝前還見麼若言見將心見將眼見所以道一切法不生一切法不滅如是解諸佛常現前又曰見色便見心且喚甚麼作心山河大地萬象森羅青黃赤白男女等相是心不是心若是心爲甚麼卻感物象去若不是心又道見色便見

心還會麼祇爲迷此而感顛倒種種不同於無同異
中強生同異且如今直下承當頓豁本心皎然無一
物可作見聞若離心別求解脫者古人喚作迷波討
源卒難曉悟 見指月錄

豁堂法語

釋正岳

靈隱具和尚讚

鐵硬手鋒快口放行則倒岳傾湫變幻則移星換斗
直得四海翻騰五湖奔走四殺雄大振門風三玄要
丕揚家醜不惟開已之瓊花且復留欲謝飛之靈鷲
夫是之謂聖恩諍子叢林魁首

靈隱重建鐘樓募疏

竊以青閭小嶺原從天竺飛來靈隱禪叢始自理公
拈出煙雨樓臺六代之規模未墜晨昏鐘鼓諸天之
號令長新其間雖遭劫火暫輟空雷幸蒙張冢宰之
宏持得延通法師之載造爭奈家賊難防復飽蠹蟲
之腹門資共弔徒貽燕卵之憂苟非機先一著准備
方將必至末後數椽即當不少雖閻羅老子殺人刀
猶難自免則地藏比丘活人劍何用渠爲據屋裏事
原該我輩關心縱路上人也要大家出手但糧逐軍
興須有胸中完竹法隨緣起安能舌底生蓮若欲功

期可必無如事擇易行要知步步皆金只在針針見
血始得大地春回再發已枯之木空山雲起重吟久
臥之龍至乎秋高響落根塵之境一空夜半敲殘夢
覺之關兩破則不離耳目之間直透威音那畔可謂
種麻得粟不唯贈李還桃所願見聞隨喜一枝纔動
百枝搖大小相融少許亦如多許福事到意來凡有
熱腸難坐視拳堪落處幸逢好手共彰名

書冷泉送別詩後

憶在癸未之秋溫公于石以進士選徽李南歸就道
訪舊于杭之北峰余酌冷泉而餞之亭上贈之以詩

別去二年公以大義死於官至甲午秋去與公別者
十二年去公死者十年矣時余在三峰適間居懶
見中有行將觀子太平業可勿疑余謫墮人之句殊
大不類蓋唐之李公長源見懶禪師於衡陽宋之錢
公若水見陳希夷及老僧於華陰懶師老僧各以二
十年宰相許二公更加錢以太平之記李夜間懶清
與先世淑而後怡悅曰師必謫墮中人也夫李公天
下士不必諷師始識老僧雖不知何如人然以希夷
言亦不必錢公始識惟懶師非李公老僧非錢公皆
不能識也余庸人也安得公之如李而識之倪而深

惟竊有似之者惟一懶耳然此又余膏疾卽愛我如公不能療此豈公所取我敢望以謫墮見目乎是公不余識也至若李公太平不及錢公功業過之今溫公不惟無李公之功業并非宰相不惟無錢公之太平返歿於禍難是我不公識也余詩用亭豈不悖乎旣而歎曰使公不遇禍難與錢相反則公之大義亦何從而並李不朽耶雖然使公不死必隨所處之治亂皆當各有可觀卽爲太平宰相亦自有不同時人之泯泯汨沒于榮利者余因有以慨夫今之出世者旣棄其所最親極重而不事其實從朝至暮思千計

忙喧熱是務陽則假題法門陰則實爲榮利以此
視彼俗士不若況能以道自任耶然終其身無倦者
惟勤有餘耳以余之懶較彼之勤其所成就固遠不
相到然其塵勞苦惱庶得有以少息如放翁所謂天
欲放閒先與老人因見懶悞稱高之句則公之所以
識我將無是歟則余與公之相識得果之味而略果
之色可也事何必確

靈隱月用禪師塔記

爲靈隱書記月用禪師靈骨入塔湖著聖明山飛龍
鳳地靈斯效人傑是生恭惟明寂月用禪師斐公少

挺拔俗之韻十五年高視橫山早負絕倫之才數千
里喧騰藝苑持論惟公不以喜怒爲毀譽投分非黨
不以附離爲親疏濁流清流二俱不足以溷真是指
非指一往無旁乎置辨把臂入林半是狷者狂者無
心合道豈問儒耶釋耶良由胸中無物故能腕下無
塵善泄嘻罵爲文章時吐性靈爲吟詠礪坡叟石公
爪牙澆剝班馬之優孟鼓謫仙放翁鑪炭捉敗漢唐
之永銀但行空天驥非芻棧之可羈不世祥鸞惟雲
霄之是舉且夙有奇情願言禿老爰就魔宮以揮智
劍從鬼國而入慈門方藉鋒閒筆陣直掃邪宗湯沸

研池深溝法漚奈何數不待期天不衛道致使若人
云往有識興嗟所賴名無僞立得建歲寒霜雪之標
交不苟同能感有道死生之誼往者曾爲嵩明教祖
塔捨舊山以歸永安今則竟就古先生西鄰卜寂土
而近靈隱可謂觀果知花報施不爽舉函索蓋人地
相宜惟是千生鑄就一具富貴性底舌頭雖饑不喫
宿食百劫帶來兩隻貧賤相底手掌靈困不使他錢
把無孔簪炊烟現乾闥婆半空樓閣將無粒米煮飯
撒羅摩詰平地珠璣這箇希奇物件古怪東西卽今
落在顯靈手中要且向何處馳騁神通展施伎倆不

見道你有拄杖奪卻拄杖你無拄杖與你拄杖你還
甘也無以拂子作圓相送入骨具云龍得水時添意
氣虎逢山勢長威猛

與許偕庵居士 戊子

靈隱法席賴妙師唱導頓令千秋祖令一旦斬新所
謂臨濟法道大行吳越之間者不基是乎竊惟萬峰
老人平生爲法之心於此足以仰慰居士夙宿宏護
之願亦足以雅酬矣更喜入門一著居士卽以甫田
爲福田使一切人落在第二尤屬快舉但妙師慣用
借句明公竟致平日膏肓攢簇不得然致病之由山

野實不能異責愧無神力變大地作黃金使之花開
枯木只索遠請晉陽之師望爲答一轉語庶不死在
句下耳

復靈隱剖玉首座

驚嶺珠泉相去無幾乃越夏徂冬促膝之緣甚寡時
方以此爲悵旣復杖笠飄然益使追晤無從其割情
之刃抑何勇于雖道人行徑如火消冰非世間刺刺
臨歧者可擬然座下有千里之行動成累歲之別會
未一具威儀入告方丈恐座下於此亦未有安則區
區省覲似不能闕然於新歲也悲今法季塚狐竊北

斗之光沐猴登衣冠之場左右當老人罵望乃能獨立達引其高節謙光固足以媿末流而免增慢第據我輩本分自有可行可止一條聖賢大道其視負青天揚白日者猶礮礮乎其小哉矧紛紛齷齪輩曾屑與之爭白黑乎靈隱法道日隆正恨成褻乏人座下豈能高枕竟以一紙之使以塞眾望耶

奉靈隱具老和尚

頃違杖侍久失候敬竊惟和尚爲眾過勞似宜攝養故凡得已之文概就節簡不敢加煩無已之思惟願和尚安隱少惱以堅法幢使直指祖堂一新兩浙聖

恩道化獨振諸方則某冷舍廿年籌紆置壘破堂七
載守類抱闕其深衷密願於是乎爲不虛矣故雖背
中非人閤室之戈身遭異已排牆之壓亦所甘焉小
子孳生叨漚秀末荷嘘枯嗟乎業重福輕志長年短
固云死生無憑彭殤妄作其如玦珮之器未就以致
追琢之功罔酬感念交并慚歎莫寫謹此布意并代
面頌

賀晦山法弟新住靈隱

頃蒙垂照不擇污瀆已見眞公之於南老非他人可
及兼酒楊瓶濡我魚陸誼甚原鴿諷咏何極靈隱祖

庭故五大禪刹之一山川人物實甲海內蓋自晉理公而歷一十五朝五焰更暉如日月燈明傳光無盡餘列十科而登高僧傳者勿算奈於成宏以降法運頽瀾非止參士無歸卽雲水單懸求一食了不可得愚童齡入山每覩餐風藉草之士念昔憊今輒思所以安之而力莫能逮愧歎無已後見天山老祖於淨慈便能簡點玉石謂此勝場非得正法眼有力大人不能起二百年墜緒已承檀護寺眾謬以破堂見委因假此守靜以待賢者致感山友徂公及諸耆彥雅意萬峰恭請雲門和尚至期赴院連雨忽晴法座纔

敷喜登靈鶴一時瑞應道俗喧傳山是湖海浩歸鉢
指期以萬計爐鞴宏開室籌莫數羣材效用信施雲
臻未幾百廢一新傑出浮幢海利但恆情所慮多謂
物極必變太盛難繼或引天童之寮宇迄今空者什
幾日久雨雪磚瓦補易猶難況近宵會其間俱應接
待交際徭役守成之難不更倍於開創耶然天人之
應既有其開便有來者昔吾弟方首眾時杭之紳掖
共得我心之同早有成望於座下故今一十九年果
應期而得環錫雖在人則積修之依報在地則當興
之嘉會惟是歷代祖庭獲傳吾宗正脉識應潭沲道

行吳越以副愚平生願望故方處憂患不禁合掌北
高峰下博慶莫能已也茲緣還山未卽先命下執事
代爲布意萬惟爲法爲人省節餘勤以專鏗煏無任
祝切

晦山法語

釋戒顯

濟顛本傳敘

維摩云菩薩住於生死不爲汚行而布袋濟顛酒仙
蜺子竟爲汚行者何耶良以旣證果人欲度執相凡
夫不得不隱聖現劣故也濟顛本天台羅漢示跡塵
中出家靈隱繼遷淨慈蹤跡最爲奇特予嘗謂因中

果地二種行事迥不相同果地中人示爲汚行便顯
神通貌混凡夫旋彰靈異決不與癡闇愚夫同一顯
倒而迷惑也今以因中人冒充果地相不過獅蟲狐種
敗壞僧儀而已何足爲正人所齒錄哉近世有等魔
禪日說宗教妄餐酒肉以爲吾學濟顛也此雖可學
而濟顛來蹤去跡種種奇特能學否耶濟顛示夢太
后口吐金佛乃至觸境逢緣現種種神通三昧能學
否耶濟顛錦繡蟠眉出口珠玉盡大地儒釋皆讓一
頭地能學否耶此不能學而徒學其餐酒肉一種眞
泥鰌學龍必至全身敗露識法者懼矣濟顛行實杭

地則有小說語雖近俚事事皆實余門人珣堂刪其
俚俗彙成本傳以流通道俗則又爲靈隱淨慈增一
段佳話也

臨濟正宗第三十三代顯甯梵音詠禪師塔銘
臨濟法道至太白而重興嗣太白而令行吳越大振
海內者厥惟三峰三峰下十二人皆宏揚濟宗負大
聲望子孫步武繼繼繩繩獨顯甯澹予坦老和尚嗣
法無人靈應先師具老人性敦友愛誼重繼絕力銀
二人續其後一曰仁菴義一曰梵音詠兩兄梵音兄
初與余同參先師於顯甯繼同省悟於秦邨又分外

針芥相契最深師逝六載後法姪祖韶請余銘其塔
情與誼其可辭乎按師諱眞詠字梵音武林仁籍
俗姓白幼依象光寺祝髮年二十稟具戒於白雀笠
菴和尚初依顯甯潛老人迴無入處未幾老人將還
化以衣拂託先師令擇器付授亦猶太陽之託浮山
也先師住顯甯師充維那董堂務外苦心參究亦未
有省發丙戌冬隨先師至高郵地藏菴結制時先師
道望傾動大江南北龍象雲擁先師令參無位真人
話晝夜發猛三七後覺身力稍疲值煎藥次忽見藥
涌沸五岳兒鼓掌高叫云梵兄要會無位真人話向

這裏薦取師廓然開悟頓見臨濟棒喝用處隨進方
丈呈解云咬碎楊岐栗棘蓬杖頭吐出威音毒拋向
人前知不知咄先師乃曉夕徵詰師耐對無滯蓋用
心最細而悟處最真也嗣後侍先師至佛日靈隱溫
研密諦承事數載透盡法中堂奧先師因念潛和尚
末後遺囑惟仁梵兩公係曾親炙克圓前話乃以所
託衣拂付授兩兄卽令仁兄住顯甯師充普化克符
輔佐三載乙未春受普甯請進院次殿宇傾頽僧堂
圓寂師往未半載學侶輻輳檀護欽崇師提持佛法
外復營土木叢林大概煥然改觀矣時方多故土寇

內訶顯雷祖席幾罹兵燹台院耆宿通郡縉素敦請
師住師堅執不允靈隱老人曰叢林有難忍坐視耶
師不得已移錫進住後二虎朝夕環繞哮吼一月有
餘盜氛方息僧子滿集虎亦絕跡矣住持六載回眾
歸接道風徧洽癸卯秋忽示微恙回寂前三日鼻中
流出一珠大如豆作琥珀色光燦四表眾爭求無資
師索云待老僧自驗看纔接過復投入口中泊然坐
化時八月二十六日也師性最慈忍素不與人牴牾
同代調和水乳無間所至料理叢席識大體謹細務
又入文字三昧深穩精到能穿貫經史法語偈頌皆

超出尋常領府三觔云洞山直撒綬天網信手三觔
不用秤無面金鱗霹靂盲龜只顧定盤星頌龐居
士參馬祖云馬師一口西江水吸盡龐公萬頃家拈
得策籬無活計諸方眼裏慣淘沙頌浮盃淩行婆話
云盡道遭他陷虎機橫身虎口有誰知若還不遇趙
州老哭到如今沒了期尖新徹透手眼出格諸方傳
誦師與仁菴兄後先唱導響振松堂不負靈隱代囑
眞臨濟睡虎也師壽六十僧臘四十有幾嗣法弟子
四人某某等以某年月日奉全身塔於本山鉢盂峰
下銘曰

溥沱一派吳越令行松堂圓智爰闢祖庭於太師塢
厥號顯甯澹予坦翁崛起再興澹翁西歸梵兄繼美
虎吼賊消山門固壘法說雷轟僧歸雲委磐石斯安
頌聲肆起六年行道鎮靜不撓擊塗毒鼓發王庫刀
兩浙左右道望日高何期一旦覺樹花凋舍利流珠
堪留供養一口吞卻何處近傍鉢盂峰下法身無相
更問如何滔天白浪

請天衣乾和尚住靈隱啟

伏以逆風飛鈍鳥自慚拙者占先大海趁遊龍應識
後來居上高才捷足喜在伯仲之間人傑地靈仁看

風雲之會難逢快便驗在目前恭惟老兄石城間氣
白社畸人久受印於先師稱入室之真子五千祕之
光孝表顯奇能十一載之天衣發明利器弟以無能
妄有靈隱愚不知分類飛蝶之負山位過其才笑醯
雞之飲海茲以因緣旣滿老病相尋瓜期久過苦覓
代以無人虎背難騎每興懷而欲下謬將重任累及
老兄非出已私實邀神聽六人而首膺大器三祝而
獨攬高標稟佛祖之至公力爭之不得由伽藍之暗
點天定者勝人喜眾志以和同實天然而端正愧弟
如聾如啞久撐順水之舟仗兄新令新條一整皮寬

之精能易施其照用庶有補於桑榆何句虎爺謝還
象駕

復宣隱雨序諸兄啟

竊以崑崙出祖席貴且禪闕老人騁蓋代功地海內推
天門戶絕盛難繼雖驍馬敢負須彌自見稍弱
景安能吞巨海伏承雨序諸兄徹底婆心多方接手
連章累函呼回演若之頭異口同音扶上香巖之樹
雖是寸莛博學日薄桑榆二十年江右楚天頭章甫
將七八區變白波院拽起拖犁征塵已倦於津梁隻
枯槁甘於慈恩何期老人成功不處喬遷雙徑之巖

重以諸兄推轂惟勤勸返冷泉之席因緣既定推託
無門自知進步以非時只得全身而就父直指堂前
之三拜華萬寧之我恨丹陽道之以重宣笑南屏之
拍掌歸歟此日業在其中父子聚頭重問三生之石
弟兄復相相依九里之松會面非遙肅函布復

復溫隱眾謾法啟

以師承法閣下金粟前身匡廬應跡掌擎佛剎
久當於毘耶力衛燈傳望風高於公美預靈山而承
付囑推願海而矢金湯藉藉高賢稜稜間氣唯冷泉
巨剎亦縣雄嶠百四十代祖山雲蒸霧擁三千餘衲

舊唐鳳繞麟翔况加老人挺蓋代之宏勳開彌天之
法海蟬聯雀起須遜過量之人豹變龍驤應待擎雲
之客山野樛樛庸姿鎬瓢朽質浪棲江楚分老巖阿
何期眾護臺推多年之社誼懷我好音屬再至之簡
書星言鳳駕自憐鈍駑勉試鉛刀久爲窮子以述家
喜聽德音而就父藉茲鶴和長瞻有道之光望以嚶
鳴更賜如天之翼削函先復領誨非遙謹啟

復靈隱各房耆宿啟

竊以靈隱巨席列祖覺場海日江潮佳話千午現在
三千八百靈山一會儼然喜邁老人功高再造鯨鐘

隨鼓雷聲等敵平神州晝棟飛翬金碧光浮於赤縣
欲求繼繼無用搜奇豈意匪材謬加推轂萬壑公之
三井判驥已入驛金鈔應闕之苦留蝦跳何曾出斗
人居窮子復返家鄉歸師命以難違實眾情之過汰
時云既至雖爾趨前謹復

復武林眾文學啟

夙仰眾護法大居士門下儒宗威風法苑祥麟竹倚
蒲團久受靈山之囑青鞋布襪共推蓮社之賢乘金
粟之願輅作冷泉之宏護竊以聖湖雄霸歷祖洪基
文喜宗風冠曹溪而傑出晴堂道望空少室以橫行

百四十代之雷轟珠回玉轉千七百年之電閃虎躍
龍驤况經老人巨靈再闢蓋代無雙雙徑重登成功
不慮欲得拔萃超羣之作須俟金聲玉振之人豈意
匪材謬承俯採津梁已倦愧飛蠓之負山分量難容
笑醯雞之飲海辭之弗護勉爾請前望魯縞而思穿
顧馬鞍而再盼藉瞻有道一問金玉之音喜遇新知
永固宗雷之好謹復

在廬山復靈隱眾護法啟

葉舟西渡時懷鷺嶺之春片紙南來頓發匡廬之彩
正爾金輪坐斷誰知琅簡驚傳五老峰頭笑藏蹤之

未密三峽磯口訝問津之有人湖海相存雲天知戴
恭惟靈隱眾護法人倫喬嶽法苑祥麟竹椅蒲團夙
受靈山之記青鞋布襪久推蓮社之賢矢心牆塹祖
庭赤手金湯法窟冷泉鐘鼓再振事豈小緣雲門法
道大光端緒眾力茲者念三生之舊好辱千里之郵
筒久隔知音儼如覩面就巖中而晏坐豈拒天花聞
大地之琴聲自應起舞止以禪扁幽邃法海淵宏自
慚榆枋之姿難翫扶搖之翼丹崖翠壁望雪竇以遙
辭松食荷衣慕大梅之棲隱孤峰度德絕壑捫心鎖
鐫之劍無成能離素匣神仙之藥未就敢躍金瓶是

用破壁孫撐雲瓢高挂月明彭蠡如聞六橋風雨之
聲翠倚香爐恍見九里松杉之色况兼蘭社重以瑤
華然而垂手入塵自知非分種田博飯正合今時身
衣薜苔雖護西山之座主日朝雲漢暫同南嶽之閑
僧癖匪痼於煙霞跡且儕於麋鹿聊云藏拙豈曰養
高目前匡頂眠雲伴千巖之瀑布有日泉亭攜手聽
萬壑之奔雷時可則決若江湖人遠而心同水乳遙
瞻紫鳳敬謝青猿

天童三峰靈隱三代老和尚贊

堂堂三代法中之王鵬鵬虎踞創闢禪荒或一條白

棒而問鼎定鼎或五宗宗旨而四利雄強至我靈山
則機神鐵鶴用驟龍驤潑天門戶高跨大方若非乘
御風願誰能便游洋冷窻如雷霆之震而日月之
光映祖孫肅立非兒戲撥轉乾坤在一堂

靈隱寺和尚像贊

奮鐵鵝眼提毒龍湫釘嘴鐵舌鬼哭神愁雖沒頭腦
卻有機籌靈山大會太煞風流湖海浩歸座擁五千
之衲付授不苟名高四百之州大可笑者吾輩老弟
兄人人自謂機能陷虎氣可吞牛被者老漢穿卻鼻
孔把住繩頭蝦跳何曾出得斗唼除卻簸揚家醜外

更於何處雪深巘

靈隱禪堂募重新翻蓋大雄寶殿疏

靈山殿閣聳出雲霄體勢嵯峨金碧瑰麗成浙地通天之名勝增武林莫大之輝光不但東南雄鎮誠爲海岳崇瞻寶先師老人蓋世之奇功不朽之盛業也但以昔年輻輳因緣成功太速亦由匠工蓋法鹵莽不得真傳以致筒瓦削薄雨久而泥水侵椽柳杉太長雪壓而瓦鱗脫節苦四圍之發漏悲聖相以沾淋三十二大士之湧壁立見損傷二十四諸天之寶容漸憂圯斥佛像偕菩薩像以俱危大殿與天王殿而

同病若不早圖翻蓋後此愈費經營爲此特具因緣
敬告十方檀護昔也初經焚蕩平地上湧出寶坊繼
殫勤勞一隻手擎來佛國而今也觀前功之漸壞豈
不寒心知急救之有方大家着力伏乞尊官長者大
力檀那遇茲勝事慨發喜心傾湘水之家珍布祇園
之金地因風吹火補漏未遲望大殿以圓成并石臺
而鋪就現天宮之妙麗滿佛國之莊嚴登廣大之門
庭還修廣大之福瞻奇特之殿閣更收奇特之功種
大因於華藏海中定受記於靈山會有緣到此盡
請當機切莫躊躇當面錯過謹疏

募化紫石增靈隱山門景致疏

靈山勝境海內奇觀怪石堆青繡出崑岡之骨冷泉
漾碧噴來雁蕩之湫秀絕天然豈待人工點綴花鋪
錦上何妨幻景莊嚴文卿姚居士眼底煙雲曾中邱
壑具南垣之妙手蜚東海之高名過浙地觀光到靈
峰叫絕擬於迴龍橋之古逕冷泉亭之四周築成分
外峰巒添出游人坐磴春郊雜逕香會奔騰大啟茶
亭廣施甘露俾細素雲歸盡得停筇而憩賞輪蹴霧
擁不妨晏坐以盤桓誠法窟之奇緣屬名山之韻事
願高山流水有待知音白雪陽春還期屬和但得同

心解佩便裝成廬阜溪橋眾手移山立現出虎邱石
座允闢好事諒所樂聞

募老和尚塔引

先老人法運方隆慈幢忽仆天崩地陷愴窮子以何
依日隱月沈歎羣衆之失照龍歸靈鷲應國堅固之
藏帷供法堂宜卜安貞之吉敬輸血淚用告同人疏
山一文二文價未曉於往日雪峰七尺八尺驗乃在
於目前自漸源之石歟雖白浪滔天正好着力請國
師之塔樣備黃金充國拈出當陽潭北湘南並作靈
山之佳話天長地久不愁雙樹之潛輝凡抱泰山梁

木之悲共出隻手苟懷孝子仁人之痛請作前茅咸
盡乃心以襄厥事

碩揆法語

釋原智

靈隱普覺房回祿後募化重造屋宇聖像佛櫃
供器等疏

靈隱寺開山於慧理尊者普覺房得名於獨孤禪師
從晉至元有靈隱則獨孤續慧理之燈自元及明無
獨孤故普覺分靈隱之爨釋迦南而韋馱北面彌勒
與伽藍居然別開生面羣飛主房鳥革羣房朱檐映
碧瓦共稱大好禪房奈造物之多忌歟於辛酉歲悉

火其廬幸背構之有人旋於壬戌年聿新其廢但浮
圖必聚沙以就而大廈非一木可成若要屋其屋佛
其佛復還舊日規模必須財施財力施力共勸今朝
勝事文徵主人難於向誰開口碩揆長老是以代其
勸緣倘得佛堂完佛像完更有佛櫃要完仝看一人
善一家善還與一國同善

靈隱庫司房化建準提閣禮華嚴經疏

靈隱除禪堂接待十方同鍋喫飯而外另有二十四
房爲子孫世守之業自立煙爨庫司其一也然餘皆
居常住西偏相距或一箭一牛鳴惟庫司房在其左

與常住之羣庶肘腋相連其房之主人曰亮宗齒德並茂日以禮誦華嚴爲課六時不輟信僧中之精進幢也但其屋宇隘陋往來喧囂頗妨清修謀欲另構精舍一所兼供準提大士其中但慮所費不貲未敢擅舉而索余一言爲之緣起余曰華藏莊嚴初不離常人塵勞業用但能一念精進破卻此塵所謂三世諸佛同證十方菩薩所同修大千聖衆所同仰法界衆生所同具當處現前不從他得況又濟之以佛母準提之靈瓊樓玉殿當下圓成不過一舉心動念間之事耳何慮此心之外有一不具足之法哉雖然

理上到事上不到非華嚴境界但能利己不能利人亦非華嚴境界矣公此舉是欲圓卻理事以利益十方檀那者也便請檀那下一轉語使此話大行

靈隱蒙堂菴化造白衣大士殿疏

語云一莖草上現瓊樓玉殿決定有此事瓊樓玉殿爲一莖草蓋卻莫被他熱瞞嗟乎天下不被其瞞者幾人哉夫慳草也貪草也愛欲草也營營逐逐只顧直前而不肯回頭一視皆草也今有人焉大聲疾呼且將返其一向所熟者而生之而掉轉之而喜捨解脫之非從一莖草上現出瓊樓玉殿乎然天下誰是

有呼則應者有則百千諸佛在汝身內更不消另起
三間安著他有像底一尊其或未然蒙堂主人名然
謾宿德也擬造白衣大士殿一座又從何處現出請
檀那另下一轉語

靈隱澗西巷募建藥師閣疏

道無居必求安之道一把茅儘可蓋頭身有眾不可
寡之身三間屋何以容鄒淵西移暉麟上人久矣欲
窮千里目靈隱碩揆志道者勸其更上一層樓不徒
是位置自己金繩界道專爲奉藥師如來從此先福
利他人綵纓結名故來叩賢奉長者資解重囊以相

成何消費中人十家之產基指初地而再闢只要損
大檀一草之功

拈花天境靈璽兩禪師頌古合刻題辭

一葉扁舟泛渺茫
呈橈舞棹別宮商
雲山海月都拋卻
贏得莊周蝶夢長
此妙總發明婆生
七子之頌也
噫婆子被巖頭一
橈伎窮力盡將懷
中兒子拋下水
中據實而論大似
不奈船何打破屏
斗雲山海月雖
則拋卻而觸目傷
懷前途更有事在
何嘗得帖然安
眠而妙總謂其贏
得莊周蝶夢長何
哉蓋總爲丞相
蘇公頌之孫女早
裂塵網皈事空王
一旦於大會棒

頭徹見本有回視世間可愛可欲如水一漚百年倏忽如畫一夢故曰雲山海月都拋卻贏得莊周蝶夢長不過借婆子鼻孔出自己之氣耳何嘗膠膠然說公案哉拈花天境靈壘兩禪師亦然其在俗爲懿親在場爲華族厭世出家同參天寧恆和尚得旨遂嗣其法於是同堂切劘互舉公案作爲頌古曰拈花合頌其計若干首以呈閱於余余讀畢不覺置卷長歎此妙總之遺響也有時一句不著而古人之公案在其句中有時著在一句而眼光在公案之外且也填篋迭唱殊路同歸孰謂今人不及古人哉雖然言裁

錦繡語製雲霞天下說禪者非無人焉至於行在說處誓以身命報佛祖恩德求之儔輩今罕其匹謂非乘願力來扶此一方法門不可吾故於題句之外表而出之此亦靈隱頌兩姪禪師之頌古也

重建靈隱大雄殿疏

代

買地布金給孤之功超鑿海投標建利賢于之智過補天崇隆大化古既如然佐揚正宗今豈不爾惟茲靈隱禪寺浙石名藍歷國朝一十五代坐知識八十四員首創宏基爰自西天慧理中興正法實賴此土瞻堂錢武王遺名勒石豈獨炳煥梵宮宋孝宗命駕

入山且圖發明心要松杉百萬雙徑猶遜雄圖樓閣
三千五山推爲有出良以法運久沈獅絃絕響大檀
不作金碧何位蒼苔長而古道封西風起而聖僧冷
某祖庭是念慧命惟心勉奉請勸宿之召不辭負山
恐辜眾紳士之誠尤爲履錯九年踰蜀固不逮臨濟
栽松十載驅馳庶幾效三平拽石其如一簣方崇諸
緣未續繩牀纔據萬指來奔雖羣庶小構粗成庇眾
之規而正殿旣頽罔售重新之願嗟梁棟之傾危蟻
殘鼠嗜痛垣牆之腐落日炙霜摧思昔三車曲誘慈
父之愛子旣然顧今片瓦不修眾生之報德奚在有

力不竭誠典守之責也見義不爲復何人是望哉恭
具短疏將告大方變世界作黃金一任擎來掌上現
瓊樓於葦草仙看運出毫端文彩未形難施好手面
目現在請注芳名

募靈隱法堂地平大方磚疏

買園償太子之金隨地布地委髮承然燈之足見泥
掩泥此諸佛建法之本因豈人天莊嚴之小果第理
由事顯而古與今殊誠欲使兒孫腳下立處皆真還
須向萬行門中逢人卽出近施力遠捨財不妨眾手
齊舉工磨校匠合縫任看一片打成雖曰凡聖交參

爭容拋潔淨珠子要且龍象蹴踞未可著眼裏塵沙
舉步知方入寺觀額把來親切何須更問那三般道
得分明便請驗取者一塊

江西景德鎮化靈隱供眾碗盞疏

喫粥先問鉢盂趙州端貴知有點茶藝舉盞子文殊
且論投機此佛彼佛既扳倒而行千人萬人亦少他
不得第物各有主而水必溯源苟不從本地薦取安
能使日用現成是磁底是瓦底全憑信手拈來或哥
窰或弟窰切忌一模脫出非是驚嶺家風設化都無
揀擇見說西江法道器量貴應方圓木蘭舟裏但使

功德歸山金牛堂前好看龍象應供

靈隱寺重建大悲殿疏

大悲佛具一千手眼無寶刹手眼不彰圓通門足八
萬福田有檀那福田始備變餽餅爲饅頭聞聲既可
悟道化荆榛爲寶所見色又好明心莫問舊壇場回
祿之日佛在何方但看新殿宇重建之年恩歸何地
梁有梓柱有楠不更買祇陀之樹地無輒天無瓦只
索布給孤之金總大匠散工而完未了費必千緡計
雕甍繡闥而告成功期以三月眾手那移固非小可
佛事一肩擔荷愈顯奇特丈夫

靈隱寺化供眾食油疏

叢林開門七件事油次其三檀那種福八邱田財爲
第一卽此因獲此果要求將來調鼎和鼎以其有濟
其無但從今日供佛及僧豐則請羅山辨主一任銅
鈔鑼裏滿盛來儉亦送投子還家也索磁州甌子傾
得出莫道喫底化了點燈又化須知今年來過明歲
還來

靈隱寺化齋僧錢糧疏

鷲嶺在南北兩峰之間曾開祖席八十九代靈隱冠
吳越諸刹之首現有大眾千二百人安居於伽藍之

內年年四季參禪剗草在佛殿之前期期三壇說戒
五湖龍象競頭奔入門都言訪道一日鉢盂兩度溼
無米何以爲炊要求七朝褒寵之地常轉法輪須投
四事具足之鄉以告長者衣服臥具醫藥非敢一槩
有所希求紅粟白粳黃梁不妨衆手擎來布施莫謂
檀那粒米須彌山喫了作何消受試觀衲僧此口香
水海填滿是什東西

靈隱重塑四天王像疏

靈隱寺天王四尊法身久已摧剝先老人補處五子
常住各有增崇吾以眇德而謬繼諸昆但問那件事

情可緩眾皆異辭而同出一口都道者鋪功德宜先
木換骨泥換胎既已大集工匠而動之金其身玉其
面焉有不告檀那而成者在秦爲秦在楚爲楚在吳
越莫道吳越匪承他力修福得福修慧得慧修菩薩
要知菩薩卽在爾躬

靈隱寺募化重建華嚴閣疏

靈隱寺大廈三千惟華嚴閣稱雄壯第一具老人法
嗣六十獨碩揆予爲迂鈍無雙頗怪丁巳之歲所謂
雄壯者突罹劫灰次至辛酉之年謬責迂鈍者來爲
補處觀梵剎東南之半壁忍使前人締構之艱鞠爲

茂草納藏海理事之四重敢乞檀那身屋之潤再整
靈山金非干鎰良未易還其舊觀人聚一沙抑何難
成此大事造法界於一心豈止善財童子在目前可
驗開樓閣於彈指仁看彌勒菩薩從別處入來

靈隱老和尚讚

乃祖大臨濟之門庭一棒到底乃父高臨濟之牆壁
棒推向裏爲渠親孫爲渠嫡子安得有與左互祖其
肩有時建立有時埽蕩何妨權與實相開其美三十
年縱雲門鐵鵲之機四百州飛冷泉蠱毒之水死者
不飲飲者必死此老胡一宗所以不滅於天童三峰

之龍爭一珠而滅於靈隱之虎收二尾歟

靈隱禮和尚像讚

師到乍浦陳山寺主人慧賢長老請

我在雲林師辭不過月歷酉丑師在者裏等我乃有
五年之久若非法乳在在能周似泉出於地誰令吾
心頭頭得達如子得其母非得母龍湫之主翁之孫
我說法要他稽首

復證南法姪及靈隱兩序

遽聞堂頭師兄之變殊爲惋歎然天下豈有不陞觀
史之祖佛哉顧其所分之身何如耳新廣孝行在說
處諸方口碑曾不問於宗黨之所期是吾師兄猶在

也何必歎至靈隱繼席之招揣蚊之力苟可負山豈
宜故爲推避以市名但念尼山氏栖栖列國非不求
仕也及於衛則又曰必也正名均名也可以市可以
無市何難定孔子之去就應當正應當弗正其權又
在衛國之君臣矣靈隱方丈顏曰直指堂宋孝宗爲
瞻堂遠公贈也重建直指堂者具德和尚也於直指
堂額外另爲一額而南面其中者乃具和尚輪守方
丈之法予號某者也予守父堂不數年一換居然高
揭名號南面於方丈之中前不見有師長後不見有
弟兄名之不正孰大於是在彼一人母足論也使有

高明如張詠者見之謂其和尚之子若孫總是不曾
讀過霍光傳則將何辭以對三年前於雲居別業蓋
嘗與吾姪論折是義蒙阿師謬賞其說許爲別正別
後又不之講卽此一言尙不能求斷金於同心之人
所經者何席此吾之雖欲報命而不能自主者也吾
姪其必有以處我矣若曰待汝叔和尚進院正之我
於三峰爲祖額而退院今又於靈隱爲父額而進院
哉

上靈隱老和尚

離崑雖以遠邇狂人其實與私願合故不俟稟命而

遂乘此拙身也臘底抵潤州方擬江楚買舟不謂揚人越江來以上方見招其主事僧則志之桑梓舊知也其蓄意蓋出自彼第志之素心切於山水又淮南人初無意淮南佳會巨兄和尚與凡相知者皆贊成之曰此揚之名刹又古聖賢應化地卽遠邁將恐大方充塞無地投閒且道人行處無可不可何必捨波濤而求源泉乎志然其說遂許之已於二月二日進院矣寺據蜀岡去城約四五里岡下有輦路里許路盡有橋曰月明鎖之橋南更半里則大河矣山上有泉通蜀味極甘舊名禪智寺上方蓋隋朝改敕也但

頽廢久矣故事陳迹十沒七八所存惟幾碑剝毀與
新構寮屋數楹毀亦復改建也獨喜其無房僧舊住
耳應用什物自無一有往來應接悉隨家之豐儉而
入院施設姑謝絕之蓋不敢草草效顓博一時熱鬧
以驚俗眼玷師道也若乃隨宜啟導不負參隨教十
百眾行腳本志是又素所蓄積而不敢他委者原志
所樹不及先德有願不爲今人而早自離師不能盡
諸天下事又不欲便安頓暖與草木同朽腐一旦肩
此荒院謬爲人師誠知力不勝任私竊藉此爲勉進
地用副師長之望耳前路誰何利鈍悉付之龍天亦

不敢置成見於心胷也狂兒遠遁猶恃父慈敬遺客
司侍僧代申頂候具白前事伏惟老和尚必另賜教
督也不勝激切懇禱之至

上露隱老和尚

曾兩以書白住慶雲之由皆未得回示今復有所請
敢悉布之蓋此地自仁兄遷化之後看守者惟一自
達而檀越又二三其議故虛其席者一年有奇從甲
辰至乙巳秋乃彼中緇白忽以補住之任舉及原志
志訊其故則曰一請開之兄不就再請天甯天甯又
不就也其時自達已有不能立腳之勢矣適值禁僧

之變欲一遣人稟白而不能惟念老和尚發軔之所
春秋大夫出疆事有利於國家者則專之竊附此義
遂勉應其請意者以爲雖不告猶告也又先是仁兄
至武林自達乞假他往兄度其勢不可留乃以手書
相託於志其致詞有曰後堂達公頗自愛雖質性稍
魯然肯用心參究昔聖門以魯得參故是上品流亞
素慕兄英特令親椎拂百日義歸結夏當來邀之昔
死心晦堂與三佛學者彼此交參味同水乳今人人
我懷懷互相撓撓甚矣古風之難復也想我兄與義
同心復古拯時惟勿吝錙銖授此仁兄手蹟也觀其詞

旨是終欲成就此子惟恐原志不遺其歸也及兄於
慶雲化去而遂不及自達者非必謂其出於所付諸
公之一以其猶在上方故耳故原志應其請且半爲
自達私意須其他日有一線之長然後稟命老和尚
亦如老和尚之於仁兄以不負其生前之託耳此志
之隱衷而未卽告人者也不圖此子奄忽化去則是
原志所以費許多起倒之本皆於私心相刺謬矣不
然上方一片地尙在荆榛中二三學者莫非新集豈
有餘力分身兩處且分一班執事爲兩班哉事已無
可奈何然則今日不能不請命於老和尚矣或同門

昆弟中自願住者隨指一人志當轉達相護延請之
不然則有仁兄之子指菴公在聞其剝染時早定爲
仁兄之嗣以祖之命繼父之統而原志又從而周旋
之以其不得施於自達者效之此公指一快舉也不
識老和尚以爲何如或渠不欲遂爲叢林主姑令其
任一職以隨志俟一二年間寺中大差畢志當一爲
料理之志竊計此有四利焉一則可以分老和尚爲
指公之勞二又償志之所以待仁菴兄三指公不合
以杭人而卽便居杭四原志索居江北舉目無可共
語不啻牧羊之蘇武誠得如指公者一人相聚年載

或不無彼此之益也總此四利開設兩端或卽命捐
公繼席或姑令同門赴請一聽老和尚裁斷之志不
惜曲陳底蘊者恐竊議之人謂當日住持何不呈白
而乃於今日呈白也

與靈隱願雲和尚

向以拙錄稿三冊求教想已塗抹矣特專侍頂拜冀
卽擲還是處不是處急欲見剴削證據之所在改轍
易路也說法古無定格而欲期盡眾生之性譬良醫
不自炫我有神丹而以瘳人之疾爲良馬師百丈黃
蘗臨濟是也興化而下海會而上或用硝黃以瀉穢

而無法與人或用參苓以補元而爲物作則莫不通
變臨時愈出愈奇較之前者又一更新初無規規之
式使人可步躋而至迨昭覺錄出是藥者採將來盡
大地之病於是平生非妙喜善述變其劑用其方幾
以山堆嶽積之物掩其殺人活人之效後之刻鵠求
飛者圓陀陀露堂堂猶然金科玉律遵不敢違起死
回生之術固如是哉弟心不人然而不能逃人之不
然亦所說到此而所行不必到此也海會上其人可
法而法之則難昭覺下其人易法而於法不屑先師
既遠鍼艾無聞思一排我憤我者落落無所適從和

尚法中長兄內外典之飽學也幸以一言開我昧昧其惠不小

與靈隱晦山和尚

和尚託鉢出門弟有要語欠與和尚一滴不日道詳下當事諸公將送弟還川矣弟意頗欲乘此交代但交代之法須稍用權宜而交代之人又必須與弟同一性命念非和尚不堪此任非弟獨私於和尚也與八十五箇老子合轡面上不慚儘百千萬雙眼睛相著心裏不怕豈是兒戲事且和尚嘗有意返江楚矣與其向天上雲居爲兒孫理百年家業曷若在天

徑山替祖宗挑一日擔子哉時至勿失先聖名言脫
使和尚住靈隱不三年弟不敢啟此口也必欲和尚
謝脫靈隱而住徑山弟亦不敢啟此口也住定彼山
遲遲尋替手交割此山在和尙轉換處討許多便宜
於先師常寂光亦增許多聲價也豈不可喜和尚未
出門時不卽面爲懇請緣府案未白懼以疑事搖旁
人之舌耳今白矣特煩睿公通其惓欸望垂允諾弟
當預爲料理之言所不悉睿公可代悉也

與雲林廿四房者舊

某腦淺人也尸位靈隱一十二年自顧無纖毫好處

有益廿四房者售乃辭院之後荷蒙道誼之厚種種
出於情謂中心藏之何日忘之九月初十重進三峰
院此地雖愚舊曾住過之席又經一十六年數更主
法壁壘旌旗大費整理又值去秋失收前人所遺官
錢私債二百餘金措置無所坐此之故幾欲專人一
展謝私而未遑以致愆期至今也歲序更新竊惟雲
林廿四房老幼少長皆我故人亦皆我之法屬諸惟
精進辦道使人稱天下名山所出身之人宛爾不同
卽此便是雲林再造之祇也南望額手言不盡意

與戶部王阮亭侍郎

從乙巳七夕至今歲丁丑暮春之閏計與先生別三十三年矣總此三十三年祇於辛酉春草小札託蛟門汪比部一候食息時以從三峰應請維揚善慶之便故有此寄也不半歲卽有杭州靈隱之役此剎爲先我而住者一敗於訟再敗於火某收合餘燼誓以身命前後一十四年始得復還先師具德老人創建之舊觀所可傷者自汪比部謝人間世遂無從藉手再達鄙私於大人先生之前哀往思存不能不臨風悵結耳癸酉春以不甘受無故殺士之辱復從靈隱抽仗來憩三峰回思禪智山堂夜集名人一十八位

賦詩贈行曾幾何時今觀其姓字赴天上修文者過
半惟新城阮亭王先生德與位皆巍然如魯靈光屹
立天以下爲名教主盟入世出世之士一被顏色之
接不啻登龍門而受華袞之賜顧某與先生有石上
三生之緣反如慶喜見阿閼佛國一見更不再見由
禪智而徑山而三峰而五州善慶靈隱今又從靈隱
而再住三峰七處八會作驢作馬每誦浩劫西來重
會合之句旣會合矣又成別離豈能無歎竊惟先生
爲坡公後身坡公又五祖戒和尚後身然則是阮亭
先生現身宰官不過出於偶然遊戲其扶救末法之

眞悲夙願則在吾佛世尊之雙手擎拳處也今法運之衰如百川東顏先生登岱一呼有萬山響應之勢獨不可以其全響爲蒼生以其餘響作一分佛事施之吾儕成千古佳話哉三峰乃先師祖漢月和尚得道開法之初地上下百年三峰二字之名雖布在天下面殿宇堂寮之規模尙屬草創先是某從徑山來謬補其處曾有經營締構之願而未逮今又重承其乏三年以來勉力拮据規模稍稍就緒意欲結集一往名公鉅卿之文字成一寺志昭示後來心竊自惟顧安所得天下第一如我阮亭先生其人者賜以片

言爲鎮海明珠豈非三門之幸哉抱此妄想申請無
階會有冬月桃花之開成七言律詩十首一時屬和
者僅有其人八十六歲之錢湘靈陸燦七十二歲之
孫亦崖賜其首刻者也兩公曰江黃滕薛非不南而
自稱爲小國諸侯若乃執牛耳以登壇則葵邱城濮
更有人在愚問人爲誰兩公曰阮亭先生儒林之齊
桓晉文也不有共作何以得話行天下愚耳此言不
覺心眼爲之一開前所謂申請無階者忽而有階可
進敢因嚴進士寶成家報郵遞之便附此以候卽求
命筆賜以和章嚴進士寶成汪司成東川某於兩君

皆有物外襟期之雅并聞原倡求塗抹所懼巴里之
謠不足邀引商刻羽一應其請則慙惶無地矣諸惟
爲國爲民善自珍攝曷勝北望頌禱之至

復錢塘仁和遲衡兩邑侯請住靈隱啟

恭惟仁錢兩大護法治下蒼生父母白社金湯西天
鷲嶺久標散花持杵之功東土靈山不忘額手擎拳
之囑指西湖作西江何消一口吸盡扶南終于南土
真成兩鏡高懸齊心作宰龜鶴隨身學道愛人絃歌
溢耳參徑山柏子之禪直同張侍郎格物八匡廬蓮
花之社不比陶彭澤攢眉以異政應金甌之卜仁見

簡在 帝心鎮名山拚玉帶之留還期不違本願
原志耳盈五袴之歌久欽叔度心懷兩岐之麥跡阻
漁陽方悔盛時未親治化何期靈隱補處之符謬及
廣陵遐邇之士聞命矍然發雨惕若乘招手金地之
緣而瞻有道固所願也取洗除糞器之人而繼寶位
可不諒哉但念王臣宰官猶然記佛勅而不忘豈可
釋子沙門公然置祖庭而不問僂勉趨前端爲帡幪
之厚傍徨就道總恃化育之仁謹復

復武林縉紳諸護法請住靈隱啟

伏以佛選三千非彌勒敢補世尊之處天圍百萬惟

大梵能扶正法之幢獻一花如來弟子流花一通施
三拜達磨見孫傳持三拜大事因緣既不起王坡四
部之請小可淨道何以當靈山一會之招恭惟諸大
護法闡下傳門山斗法苑金湯身依紫閣萬姓仁霖
而以遂生心係名山諸方倚光明而市帛與陶謝宗
雷轉蓮花之社合蘇黃楊李參鐵鵲之禪四大掀翻
佛印也留玉帶鎮山門一拳識破黃龍不怕鐵蛇橫
古路談妙談玄等同遊戲作屏作翰流出真誠志才
非世間之倚馬每恨不識韓荊州賦讀方外之風章
久賴一交李商老徒以拄杖腰包離師太早遂致吳

山楚水思思江方愧文殊草履未跼毘耶孰意長
者環兩道投石室呼猿洞口遺薪期我負荷冷泉亭
上積水變我激揚聞命以驚發函而懼先師之靈骨
適在持鉢何難上法堂小師之塔樣未諸寸木豈容
支大厦取貌似聖人而師事之已欠斟酌以生從佛
口而位置焉可煞慚惶但念名教大人猶然秉佛教
而不忘何況釋氏兒孫豈可望寶所而自退勉策駑
馬川試鋸刀承先起後敢云有一法與人讓主推賓
更望舒眾手庇我謹復

重刻字彙題

字彙一書宣城梅氏酌古準今以二百十有四部統
三萬三千一百七十九字以該三教諸書而釋典殊
難綜核然審音會理大端不踰此誠後學之津梁也
嘗見世俗嘲人不識字則必勃然怒不知讀書難識
字尤難魯魚亥豕毫釐之差謬以千里且字心所歸
也徒精六書不稟方寸字日以增心日以減字日以
真心日以僞夫如是反不若一丁不識者之爲得也
嘗思上古畫卦之始止一奇一耦自無而之有雖三
萬三千一百七十九字不爲多自有而之無雖一奇
一耦不爲少庖犧老人多此一事轉使後人混沌曰

盤墮文字禪也老僧不識字故胷中無一事雖然一
奇一耦之始卽儒門之達磨宗也達磨言不言文字
不是不識文字諸人又不可以老僧之不啣嚼藉口
也茲緣本山重鑄此板成司刻者請題卷首書此付
之時康熙戊辰浴佛日靈隱碩揆道人原志題并書

諦暉法語

釋慧輅

住杭州靈隱禪寺

康熙乙卯年秋七月二十一日徑山五嶽和尚同闍
郡紳衿文學居士本寺各房老宿三竺集慶諸師泊
因院新舊兩序執事恭請和尚主持靈隱丙辰夏四

月十三日進院兩序諸執事諸陞座師云身在至化
中當宜第一義便上香云

萬歲證明祇如

東宮殿下

檀護宰官時向者裏得何三昧得何受用又上香云
瑞氣彌新本寺各房老宿隣山諸位耆英卽心卽佛
常住新舊兩序兄弟非心非佛便恁麼去且道是一
義是二義再上香云面目現在復舉香云看看雲居
師兄燒在雪裏天衣師兄燒在水裏徑山師兄燒在
火裏新長老今日從雲居天衣則是從徑山師兄則

是乃炷香鑪中云莫道雷同阿耶阿耶恰恰觸着先
師鼻孔遂噴嚏一下云小子識之徑山和尚白椎已
僧問靈山一座大眾雲臨正令開張何人及第師云
大清國裏只三人進云恁麼獅子吼時芳草綠象王
行處落花紅師云兩個被你道破還有一個作麼生
註腳進云一番提起一番新師云大似撞彩問門庭
施設祖令當行和尚將甚麼表示師云聞風買扇進
云一句迥然開祖印三玄三要整蔡林師云只恐三
玄未會在進云相續一句千古奇逢舊店新開是何
面目師云俗氣不除乃云遠放近收絕滲絕漏先師

之心也乃左顧云可是真的一啐一啄或威或慈光
師之用也乃右顧云可是真的人能用得是心方堪
入此門戶立個宗眼不然總屬依草附木影響異流
喝一喝云新長老之心也用在甚麼處又喝一喝云
新長老之用也心在甚麼處又復喝云點頭者一任
點頭吐舌者一任吐舌復舉云昔日知聖住靈樹時
二十年不立首座鄭重如山常曰我首座生也我首
座牧牛也我首座行腳悟道也誰不恁麼一日聲鐘
令山門外接首座眾出迓而雲門至若合符節靈樹
曰奉遲久矣卽請爲首座一眾皆驚最後封一函令

知事呈廣主劉大王曰人天眼目堂中上座靈山授記未必如此復云爲物作則事非草草言不合乎靈樹之心行不得乎雲門之髓而稱佛祖兒孫終爲忝竊還知此二老傑出肝腸古今不墮道理麼乃點頭云終不敢辜負乎此結推竟便下座

結夏陞座僧問如何是透徹一着師云指天指地有誰知進云可謂驚天動地師云試驚天動地看僧擬議師便喝問盡大地是個禪堂教學人向那裏坐香好師云上座貼單也未進云牽累人不少師云還是你自累問說玄說妙指東話西設有不受羅籠的來

和尚有何相爲師云我不指東話西僧擬議師便打
進云明知和尚有此一棒師云猶嫌少在乃云拶着
痛處彼此不饒爬着痒處就不意消我王庫內無如
是刀是故黃龍向手腳間設關臨濟於料揀處作主
若要驗龍蛇辨得失猶未可在祇如古人道道得也
三十棒道不得也三十棒還能喫此也無重賞之下
必有勇夫

實相監院全道一大德領瑞雲德宏二禪士設齋請
陞座僧問四大本空五蘊非有請問和尚以何接待
眾流師云言前須薦取末後意難詮進云個中消息

蒙師指物外新光意若何師云試道個中消息看僧
喝師云除卻喝別道將來僧擬議師便喝云只解爭
先未能奪後乃云向上轉去烈日應寒向下轉去薰
風成醋折中而論破得佛見堪與文殊爲師劍爲不
平離寶匣破得法見堪與普賢爲師藥因救病出金
瓶若是沒量漢聞靈隱恁麼舉便解遇塵破塵遇垢
破垢遇誑訛破誑訛遇虛幻破虛幻通身轉轉轉通
身活卓卓不爲分外正恁麼時文殊畢竟何處安身
普賢畢竟何處立命便鞠躬云此去江干不遠
解夏日兩序執事請陞座僧問夏末秋初諸學人東

去西去直向萬里無寸草處云如何是萬里無寸草
處師云上座還曾走過麼進云走過師云何勞再問
僧擬議師便打云話墮阿師乃云本分着子不是冠
上之纓亦非腰間之帶又非葛藤椿子是非鞵鞞將
甚麼作結將甚麼作解若言有結有解徒勞捏目而
妄生花若言無結無解爭奈滴水能興丈波舉雲門
大師云直得盡乾坤大地無纖毫過患猶是舉句師
云地動也不見一色始是半提師云弄泥團漢有甚
麼限直得如此更須知有全提時節師云喉中着骨
非賤性之所能忍諸兄弟若向者裏分疏得下管帶

得行十方世界一任獨露全身若有纖疑不但出門便是草卽不出門亦是草漫漫地也珍重

道證雪嶺二禪德同戒香上座領眾信爲惟一監院入塔請陞座師云鳥無羽而不飛人無骨而不立要展橫翔提出之翮而欲立其所立喝一喝云斷斷乎少他不得所以在天則天爲之驚在地則地爲之震還委悉麼若以三十五日以前求之溪邊樹凋葉落若以三十五日以後求之檻前山深水寒正當三十日之際又作麼生良久云若到多寶塔前提敗迦文老子始得復喝一喝云實不敢欺

師五十誕日遠塵禪德領餘杭眾檀越設齋請陞座
問答不錄師云山僧未出母胎以前撞着個興教以
其肝膈不異便與之性命相許及出母胎以後又撞
着個高峰亦以其肝膈不異而又與之性命相許已
往不論卽此五十年來或通或塞或順或逆或是或
非或曲或直總不敢背興教而黨高峰背高峰而黨
興教吞聲飲氣祇要保者鼻孔而一大家出氣今日
舉示大眾且圖兩得相見顧左右云撲落非他物海
底泥牛啣月走縱橫不是塵崖前石虎抱兒眠山河
及大地鐵蛇鑽入金剛眼全露法王身崑崙騎象鷲

鸞牽其中有一句能縱能奪能煞能活復顧左右云
靈隱到者裏不得不全身擔荷而爲萬世之下滅狐
種族者立個宗眼便下座

覺先得敬二禪德領紹興眾檀越設齋請陞座師云
行不在足解不在心一回相契干花競秀可笑天下
人都虛只向足上着倒心上稱量所以一失足無以
立一忘心無以言當知此事不在內不在外不在中
聞不見雪竇道閉門不造車通途自寥廓汝若瞎得
眾生眼要透法身邊事有甚麼難汝若瞎得佛祖眼
要透法身向上事有甚麼難拄杖頭上更有一眼汝

又作麼生。慈嶺拄杖云。一任諸方貶剝。

義方禪德。領富陽眾。檀越設齋。請陞座。師云。飛來峰石磈。磈是佛。解遮護者。唯有孤雲冷泉亭。水滴滴是珠。解啐啄者。唯有野鶴。且喜紅葉從旁。忍俊不禁。勃然作色。欲向佛頭上着彩珠。影裏爭輝。即使隨風飄流。亦片片不落在別處。若人識得者。片紅葉落處。分明要着者。件袈裟也不難。

結制日。息微禪德。領杭城眾。檀越設齋。請陞座。示眾。問。煅煉聖凡。鉗鎚佛祖。請師曲垂方便。師云上座。還受煅煉麼。僧呈坐具云。佛祖未興時者。個在甚麼處。

師云山僧卻疑進云蒙師指出波心月躍海魚龍意
自殊師云煅煉且緩緩乃云透脫一路只在諸人咬
嚼不行處然一生心動念卽便白雲萬里山僧今日
亦無別說只將小釋迦之圓相作汝頭雪峰之木毬
作汝足雲門胡餅作汝心吹毛劍作汝骨浮山九帶
作汝肝腸靈雲桃花作汝手破沙盆作汝口乾矢橛
作汝眼拄杖子作汝鼻踞地獅子作汝爪青州衫
庭前柏作汝耳通上徹下無毫髮許不是佛法心髓
還迴避得麼推委得麼其中着得悟麼着得迷麼着
得自己麼着得非自己麼不妨伶俐好喝一喝云我

但一串穿卻不愁汝承當不下也

啟戒日靈超大德設齋請陞座問如何是離四句師云掩耳有分進云如何是絕百非師云承當無路進云如何是祖師西來意師云不必重言問既是飛來峰因甚不飛去師云前人曾道破進云冷泉水因甚只去不回師云把住不得乃云佛是心之垢心是拄杖子之譬如不滅得是垢安能殺得者譬驀卓拄云若是靈山種草自解恁麼提持金翅鳥無端高叫曰感伊不徹感伊不徹水潦鶴放生大笑曰說甚感伊不徹直是恩大難酬復卓一下下座

解制日陞座僧問打開布袋頭放出瀉山水牯牛放
去且住當時水牯牛瀉山作麼生收師云叱叱習擬
該師云畜生退後僧云通生無影像處處絕行踪師
云轉見不堪乃云掀翻得列祖窠窟方堪獨步稱尊
所向無礙不然行被行礙坐被坐礙用棒則棒礙用
喝則喝礙遇江湖則江湖礙遇天日則天日礙即使
有個自己而亦爲之礙山僧一冬以來行坐處與諸
人方便棒喝時亦與諸人方便江湖天日間無不與
諸人方便惟其自己分上不敢加一毫方便何故莫
是識法者濯磨非也莫是再犯不容磨亦非也不加

一毫方便意在甚麼處便起身云知恩者少負恩者多

僧修五居士為設齋請陞座師云枯木裏龍吟血脈不斷鐵裏盛雪分別不得前念卽是後念金聲有餘後念卽是前念玉振無盡一不得則異異不得則一此雖人人本有之常其如一回舉示一回新也拾掇漢一問舉着必不作世諦流布之想然而居之不疑行之無倦還有其人麼揮拂子願左右云我佛我皇所願相望久矣下座

玉山琺師法語

乾隆三十年閏二月十二日

皇上駕幸雲林

臣阿林保跪

率眾恭迎

聖駕進得殿拈香拜佛

臣

僧擊磬拜畢

臣

僧叩首

皇上問云你是住持麼回奏

臣

僧住持

皇上問云十六年的是甚麼人奏云十六年的義果是

臣僧的師父

皇上云你就是義果的徒弟麼回奏云是

皇上問云二十二年的還奏云二十二年的

德元是

臣

僧的師弟

皇上云你還是的師兄麼回奏云是

皇上又問云那二十七年的聾回奏云二十七年的德

泉亦是僧的師弟

皇上問云德泉那裏去了奏云已經退院去了

皇上又問云你是那一箇舉的聾回奏云臣僧是蒙撫

憲熊大人舉的

皇上云你就是熊學鵬舉的了臣很好臣僧謝

恩

皇上進行宮川茶臣僧復進新茶

皇上笑云知道了供佛罷臣即起

駕到飛來峰命侍臣吹石洞吹簫了

皇上一笑卽起

駕臣僧率眾送

駕出山十三日

皇太后駕幸雲林 賜住持德琳飯 賜香金五十四

兩

皇后賜香金五兩十四日奉

旨到宮門領 賜香金五百五十兩 衣緞八疋 藏

香八束 唵叭香四封 石刻佛像一軸十五日

皇上駕幸天竺臣僧德琳率眾恭迎

聖駕進殿拈香祈晴臣僧德琳擊磬拜畢臣僧謝

恩

皇上問云你是雲林的住持回奏云臣僧是雲林住持
奉

各憲兼管法喜事

皇上云好你是甚麼字輩回奏云臣僧是實字輩

皇上云你是實字輩的可參禪麼回奏云參禪

皇上云參甚麼話頭回奏云參萬法歸一

皇上云卽今一歸何處漸回奏云大清國裏

聖天子

皇上云莫這便是你的兒處麼回奏云南無無量壽佛

皇上微笑命

賜法喜寺香金一百兩

藏香八束

唵呌香四封

石刻佛像一軸卽起

駕回宮

臣僧率眾送

駕出山十九日回

鑾臣僧同諸山方丈在武林門外送

駕

皇上看見云雲林和尚也在這裏了回寺去罷

臣僧謝

恩回寺二十日雲林法喜兩寺大眾恭謝

皇恩請陞座問祖師西來卽不問

聖駕來山意若何師云步步不離

皇上進云世法應用個個向前接

駕佛法商量人人退後歸家還是向前好還是退後好
師云家活隨時用安排便不真進云

聖明天子於

萬歲牌前有何話會師云日面佛月面佛進云

萬歲供餽及僧和尚陞座酬

恩畢竟如何祝諸師云一爐沈水千聲佛用祝我

皇億萬年進云一枝無孔笛共慶太平年師云時逢堯

舜世自合樂無爲問

聖恩疊霽卽不問當陽一句請師宣師云芳騰六合香

噴大千進云

翠華臨幸和尚相見如何師云雪覆萬峰青不露一枝
春綻野梅花進云恁麼則蠻夷戎狄分諸國盡在我
皇化育中師云知思始得乃云

聖皇應世萬國歸心草木禽魚咸沾恩澤僧居山野共
沐

皇恩眞得處處仁風徧野人人喜氣盈眸所以一人有
慶萬民賴之大衆此恩此德人人頂戴且道作麼生
酬報遂炷香合掌云紫煙籠

帝闕

耆算等

天齊

乾隆三十七年四月十二日前往淡山和尚同闍院
大眾兩序諸師復請主席

據室鷲嶺雲林古杭名利禪門法紀

聖祖格外殊恩最勝覺場諸方推重殷心敢云廣大宗
風實乃潑天門戶山僧前膺灑掃今又全墮裏許芭
蕉云你有拄杖子奪卻你拄杖子還是與底是奪底
是拈拄杖卓一卓選佛若無如是眼宗風那得到如
今江南蘇州府吳縣福田菴運慈大師設齋請陞座

拈香此香紫摩金色光照乾坤玉鬢青螺氣吞宇宙
祝延

當今佛心天子龍馭萬年此香堅愈岡陵量等江海恭
祝滿朝文武本省大僚當道尊官紳衿檀護本寺兩
序同門耆碩共維法化扶豎綱宗此香恩冤難酬報
復難泄茲當一回拈出供養卽此堂上先師巨老人
大和尚珊瑚枕上兩行淚半是思君半恨君就座垂
問絲綸收拾未多時今日無端一竿持應向煙波深
處裏金鱗徧被莫來遲

同樂
不錄

雲林寺續誌卷四終